

半心半意是百分之百 hō 人厭惡 ê

「Hit 時，我 beh 用燈 chhiau-chhōe 耶路撒冷，我 beh 辦 hiah-ê 親像 tī 渣滓頂坐清 ê 人；in 心內想講：上主無 beh 降福氣，mā 無 beh 降災禍。（《全民台語聖經》西番雅書 1：12）

Tī 西番雅 ê 時代，因為受 tiòh 好王約西亞 ê 影響，tī 猶大有真 chē 人崇拜上帝；總是，這絕對 m̄ 是 in siōng 優先 ê 事項。雖然 in 公開表明 beh 對上帝忠誠，m̄-koh，in 卻無 hō in ê 「信仰」來阻止 in 文化制度 ê 衝突、個人 ê 野心，á 是崇拜假神。

結局是：上主咒 chōa beh chhōe 出驕傲、洋洋得意，kah 自滿 ê 人，koh ká in 懲罰。渣滓（che-tái）tòh 是留 tī 酒桶底 ê 物件—pháiⁿ 味 koh 無路用；咱 lim 一杯咖啡以後，有時 mā 會看 tiòh 渣滓（che-tái）留落來。當咱講 tiòh 相信上帝對咱生活 ê 影響 kah 權能 ê 時，目 chiu kek kheh-kheh 並 m̄ 是好品德。

咱 ê 時代 kah-ná kah 西番雅 ê 時代無啥物無全。雖然咱可能理論上承認上帝是宇宙 ê 創造者—全能 ê、無所不知 ê，koh 是無所不在 ê—總是，咱 iáu 是 tiāⁿ-tiāⁿ 想講靠咱家己 tòh ē-tàng 和睦 tàu 陣。咱恐驚上帝會來干涉，而且咱看 bē-tiòh 上帝 kah 咱之間有形 ê，koh ē-tàng 證明 ê 關係。咱認為咱家己是自給自足 ê，無需要 kah 上帝有積極、親密 koh 順服 ê 結聯。

當耶穌 tú-tiòh chit 種自滿 ê 態度 ê 時，祂聲明講：「你 ê 信仰無燒無冷。我 khah 意愛你 á 是燒 á 是冷。你既然是 lâ-lún 燒，m̄-chiāⁿ 燒 koh m̄-chiāⁿ 冷，我 beh kā 你 tùi 我 ê 嘴 phùi 出來。」（啟示錄 3：15-16）。基督厭惡對祂無燒無冷 ê 態度！這 mā 適用 tī 無感覺有義務 tiòh 為咱 ê 信仰做見證 ê 基督徒。這實在是真傷心 ê 情況！咱 m̄-thang 無要無緊，顛倒 tiòh 全心全意走 chhōe 上帝，用熱誠 kah 喜樂來承擔咱基督徒 ê 義務。

祈禱：上帝 ah，求祢提醒我，先知 ê 話是祢 beh 講 hō 我聽 ê，甚至是 tī chit-ê 現代化 koh 快速變化 ê 世界。求祢 hō 我有勇氣承認，hiah-ê 古早耶路撒冷自滿 ê 人民 kah 我之間有相全 ê 所在，koh 求祢幫助我了解，祢有用一個無全 ê 標準來呼召我，hit-ê 標準是用我 ê 救主做模範所設定 ê。求祢 hō 我用順從、謙遜、真理 kah 疼 ê 精神來回應。我 án-ne 懇求是奉耶穌 ê 名。阿們。（2002.09.15）